

中國圖書集成

中國書畫全書

第十四冊



中國書畫全書

全十四冊

主編 盧輔聖
副主編 崔爾平
點校 丁國祥 王鐵 王慶元
文運通 水資佑 包于飛
車鵬飛 李鋒 李國強
吳永坤 吳琦幸 吳廣洋
沈培方 宗玄 周漢唐
金學智 洪丕謨 姜漢椿
陳江 陳先行 陳翔
陸海明 陸國強 陸錫興
唐讓之 師研生 華穎
崔爾平 許敏 梁穎
盛博 舒士俊 楊波
楊震方 鄭明 鄭翔
蔣安力 劉恒 劉凌
韓旭 魏肇靖 顧雅芳
朱李海 阮璞 何以聰
唐文 張政平 潘景鄭
蘇潤雷 顧廷龍 饒方震

責任編輯 崔爾平
責任校勘 余穗祥
裝幀設計 盧輔聖
技術編輯 吳蕃中
出版總監 祝君波 蔡大搏
上海書畫出版社出版發行

審讀

江宏

金文明
謝稚柳

中國書畫全書

特製伍佰部

本部編號

貳肆捌

各地新華書店經銷

上海港東印刷廠 上海師大印刷廠印刷

十六開本 九六〇印張 一三三六〇字 七一插頁

二〇〇〇年十二月第一版第一次印刷

定價 伍仟貳佰圓

上海市欽州南路八一號

郵編二〇一三三

後記

《中國書畫全書》自一九八七年開始編纂，在全體編纂人員的共同努力下，於一九九九年完成，共計十四冊二千餘萬字。全書除了保留專用名中的大量異體字，以繁體直行形式排印，盡可能地體現入選典籍的原生態之外，還特地採用了鉛字活版印刷方式。在印刷技術日新月異的今天，這也許更能顯示其濃厚的傳統文化品味。

本書編纂過程中，上海圖書館陳先行、復旦大學吳格兩位先生在體例、資料、點校等方面始終予以熱情支持；潘景鄭、顧廷龍、謝稚柳、張政平等先生，以耄耋之年積極參與了審讀工作；參加點校整理工作的宗玄、楊靜、王慶元、吳永坤、金文明、梁穎、鄭明等衆多專家學者勤奮嚴謹的治學精神，一絲不苟的工作態度，都爲本書的編纂出版作出了卓越的貢獻。上海師大印刷廠和港東印刷廠茅瑛等同志，不計功利支持學術著作的印製，亦屬難能可貴，令人欽佩。

國家圖書館、上海圖書館、浙江、四川、陝西、福建、湖北等省級圖書館、北京大學、復旦大學、南京大學、華東師大、上海師大、武漢大學、東北師大、中央美院、中國美院等高校圖書館，以及上海博物館、臺灣中央圖書館、美國大都會圖書館等衆多海內外專業單位，在資料搜集上給予了有力的支持，此書底成，賴助甚多。

值此《中國書畫全書》付梓之際，謹向上述爲此書作出貢獻的個人和單位，一并致以深切謝忱！

目 錄

平津館讀碑記·洪頤煊·一

寒松閣談藝瑣錄·張鳴珂·一〇五

習苦齋畫絮·戴熙·一四七

潘氏三松堂書畫記·潘奕雋·二四三

須靜齋雲烟過眼錄·潘遵祁鈔存·二六四

筆嘯軒書畫錄·胡積堂輯·二七五

知唐桑艾·宋伯魯·三二〇

金石文字記·顧炎武撰潘耒補遺·三四二

潛研堂金石文跋尾·錢大昕·四〇五

畫林新咏·陳文述·五七八

懷古田舍梅統·徐榮·六二五

小山畫譜·鄒一桂·七〇一

墨梅人名錄·童翼駒·七二〇

讀畫閑評·俞蛟·七二八

書畫書錄解題補·吳辟疆·七三六

題畫詩鈔·王愷·七四四

廣堪齋藏畫·畢瀧·七五〇

書畫心賞日錄·沈樹鏞·七五五

劉涓子書畫記·王禮·七五九

篇目索引·七六三

平津館讀碑記

臨海 洪頤煊撰

洪頤煊字筠軒號卷舫老人。清臨海人。精研經史。爲孫星衍門人。嘉慶間客星衍糧道署。取平津館所藏碑析讀之。考異決疑。別出心解。遂成平津館讀碑記八卷。嗣後益以自得各碑。復成續記一卷再續一卷三續二卷。考據明審。開悟後學。用心精密。無過于此。平津館讀碑記有嘉慶間平漪堂祖本。後于光緒間經收入爲木犀軒叢書本。今即據以斷句排印。

臨海洪君筠軒以所著讀碑記八卷示予。讀之嘆其勤且博。近日錢詹事金石跋尾用意之精庶其匹矣。王司寇金石萃編雖廣摭而精密或不逮此也。夫金石之足證經史。其實證經者二十之一耳。證史則處處有之。記載櫓柱曷可勝原惟當論其大者而已。有如唐溫彥博史稱其褊急好爭論是非。而碑特著其宏量不與人爭。其相反乃若是。岑江陵固不應作諛墓文。此當表出之以資論世者。金石文固不專以書論。然若秦繹山碑魏受禪碑。實以備篆隸體耳。唐昇仙太子碑。以其陰銜名出薛鍾二家手迹而存之。不則仆而毀之可也。若職官之除授。歲月之前後。其實有關係者著之可也。其他偶有錯互者不能枚舉。吾安能爲此費日損功耶。至唐文宗大和。宜據石刻以證板本作太之訛。遼道宗壽昌。據石刻以證史作壽隆之訛。又如漢禮器碑闕里聖母姓并官氏以證姓氏書。宋泰山碑尊賢下武以證補大雅傳說。此書不載宋以後碑。姑略撮言之。諸如此類則亟宜表出之耳。不然。豈有傳注箋疏之不治而日矻矻焉從事于拓本者哉。近日輯錄金石者多矣。未有若洪君用心之精密者故于此略及之。嘉慶癸酉春三月廿有四

日。北平翁方綱時年八十有一。

昔歐陽文忠訂集古錄。于漢華山廟碑集靈宮曰他書皆不見。惟見此碑。後儀王深寧尚書始援漢地理志補證之。國朝閻徵君輩遂有蓋代文人無過歐陽公。學殖之陋亦無過公之誚。甚矣考訂金石之難也。筠軒此冊雖僅伯淵一家之藏。然海內流傳碑刻略備。考經證史臆博簡核。拾遺補罅無少疏漏。翁覃溪閣學言其用心精密無過于此。吾知此書出。不復爲後之批尾家吹求彈射。是則筠軒所自信也夫。嘉慶丙子二月八日雨中跋于羊城臬署之吾未信齋。靜樂李鑾宣。金石文字之學。歐趙以來至國朝而大盛。亭林竹垞揚鑣于前。嘉定青浦接響于後。考經訂史剖析六書旁通二氏美矣富矣。吾友淵如觀察尤好是學收藏最夥。筠軒在幕中久。著平津讀碑記八卷考據明審于唐代地理尤多所得最夥乎與諸前輩方駕矣。宗彥素未研心碑刻近來稍涉兩唐書之學。每遇事迹舛舛輒思得碑刻以證之。讀筠軒此書多所開悟因題數語于冊首而歸之。嘉慶壬申浴佛日。德清許宗彥。

淵如師喜金石文字。生平游歷所至搜訪無虛日。德州平津館所藏碑自周秦至唐末五代凡廿餘匣。庚午冬頤煊始取而讀之。見諸君題跋未盡間有所獲輒錄于左方積成八卷題曰平津讀碑記示所從得也。昔家文惠公嘗假石邦哲王順伯兩家之碑撰隸釋隸續流傳至今。頤煊少賤不能備金石之藏游幕平津始得盡見海內所有之碑雖才遠不及文惠所遇殆或過之。夫世之所貴乎金石者以其足取證經史也。聖賢經傳微言奧義典籍散亡往往得自學士之摛詞家狀之續述。至國家易代修史或采自傳聞或成于衆手殘舛訛闕勢不能免尤不若金石之出于當時爲可據。其他如六書之通轉文體之宗尚皆可于是窺其厓略。此其學所以日積而日昌也。今世之爲是學者有錢少詹潛研堂金石文跋尾翁

閣學兩漢金石記阮中丞山左金石志王少寇金石萃編武大令授堂金石跋皆海內尊向。頤煊獲讀是碑復得從諸君後以商榷其是非則亦可以自惠也已。嘉慶十六年太歲在辛未八月十四日。臨海洪頤煊題于濟寧舟次。

平津讀碑記卷一

周

吉日癸巳

右吉日癸巳四字相傳爲周穆王書在贊皇縣壇山上。宋皇祐中宋祁始訪得之。後鑿取陷置趙州廳壁政和五年取入內府亂後不知所在。此本爲南宋越州石氏重刻本。漢書地理志房子有贊皇山。集古錄引穆天子傳登贊皇山以望臨城。今本穆天子傳無此文。此吉日癸巳四字不知何人附入乙酉天子西絕鉅陘郭璞注中。

石鼓文

右石鼓文在國子監大成門左右。石鼓至唐始顯。後漢書鄧騭傳李賢注。今岐州石鼓銘。凡重言者皆爲二字。宋人言石鼓見于唐人著錄者獨不及此注何也。第一鼓雙字。說文業。古文作業。雙即業字。詩曰四牡業業。與趨趨雙義合。第四鼓衆字。說文鑠。或從貴作鑠。或從弄作鑠。鑠即弄字。鄭夾漈以爲拜字非也。鑠字作弄說極是。或因成鼓有弄字以疑此條。愚謂甲鼓避字與庚鼓我字何妨并見。此即鑠與弄一字而丁鼓戊鼓并見之例也。覃溪。

孔子題季子墓碑

右孔子題季子墓碑。文云于肅有吳延陵君子之墓。相傳爲孔子書。唐大曆十四年肅定取殷仲容摹本刻于丹徒九里鎮季子廟中吳郡張從申有記。宋崇寧元年朱彥又摹刻于江陰申港季子墓。淳化閣帖中亦有刻本。其篆法互異。郭忠恕汗簡引墓字古文又與各本不同。

秦

琅邪臺刻石

右琅邪臺刻石在諸城縣東百六十里。碑十三行八十六字。首行五夫。二次行五夫。二楊柳。三行皇帝曰以下皆二世詔書。與史記始皇本紀所載無異。當時每刻石後皆著此段文。本紀云盡刻始皇所立刻石。石旁著大臣從者名。五大夫趙嬰五大夫楊柳前從始皇與議于海上故二世刻石復著其名于石旁。

泰山刻石

右泰山刻石舊在山頂四面有字。宋大觀中劉跂拓得二百二十三字爲泰山篆譜。至明北平許□僅得此二十九字于榛莽中移置碧霞元君祠東廡。乾隆五年祠火此石遂亡。今有岳廟重刻本訛舛不足觀。

嶧山刻石

右嶧山刻石。據封氏聞見記。後魏太武登山使人排倒此碑。後世傳摹重刻。今所見本以長安鄭文寶本爲最佳。說文。古文及。秦刻石及如此。此碑陀及五帝及字不如此作。

漢

魯孝王刻石 五鳳二年六月

右魯孝王刻石。在曲阜縣孔子廟。文云五鳳二年魯卅四年六月四日成。金明昌二年始出土。高德裔曼卿有記。錢辛楣少詹謂魯孝王慶忌以後元元年嗣。則五鳳二年當爲孝王之三十三年。頤煊謂漢表據逾年改元。故以後元元年爲孝王慶忌元年。此魯國所書以即位之日爲始。故自征和四年下距五鳳二年爲三十四年。漢表諸侯王皆逾年改元。唯武帝紀元朔元年書魯王餘薨。表書元朔元年安王光嗣。未逾年改元。此乃其變例也。

居攝墳壇刻石 居攝二年二月

右居攝墳壇刻石在曲阜縣孔子廟。一曰上谷府卿墳壇。一曰祝其

卿墳壇。皆居攝二年二月造。卿猶君也。尊美之詞。上谷府卿。上谷太守也。猶西岳華山碑弘農太守稱袁府君。祝其卿。祝其令也。猶郎中鄭固碑著令稱著君。卿爲上下通稱。故武開明碑終于吳郡府丞。武榮碑稱吳郡府卿。南安長王君平鄉道碑有丞什□王卿。尉綿竹楊卿。卿即君也。

漢中太守鄧君開褒斜道碑 永平六年

右鄧君開褒斜道碑在褒城縣北石門。宋紹熙末南鄭令晏袤有記并釋文。據楊孟文石門頌。永平四年詔書開余鑿通石門。此碑云。永平六年漢中郡以詔書受廣漢蜀郡巴郡徒二千六百九十人開通褒余道。其相距止二年。又云。郵亭驛置徒司空褒中縣官寺并六十四所。漢書地理志有船司空。百官公卿表有水司空。此徒司空亦官名。隨事所立。故續漢志不書。晏袤記云一百五十九字。今拓本止一百三十二字。

三公山碑 元初四年

右三公山碑在元氏縣城外野坡上。河朔訪古記。三公神廟在元氏縣西北三十里封龍山。下有漢三公山碑一通。即此碑。後漢書淮陽王昞傳。永元十三年立防子侯爲常山王。延平元年就國。立二十五年薨。是爲靖王。此碑云。元初四年常山相隴西馮君到官。當靖王就國之十二年。碑云。國界大豐。穀斗三錢。明帝紀。永平十三年。歲比登稔。粟斛三十。十斗曰斛。斛三十即斗三錢。碑字作升。或釋爲升字。非。

嵩山太室神道石闕銘 元初五年四月

右嵩山太室石闕在登封縣中岳廟南百餘步。前後兩銘。碑額中岳泰室陽城□□九字。陽文篆書。前銘二十七行。以後不可計。元初五年四月刻。後銘四十六行。延光四年三月刻。字不甚大。每行俱有界畫直綫。依翁閣學兩漢金石記所釋。其未畢者。前銘十八行

第三是史字。十九行第九是之字。後銘首脫四行。二行有地字。四行有三字。五行有十字三字。七行有孝字。九行孔子上是公字。十一行有陽字。十二行有北海相字。十四行有屬字。十七行有縣字。二十二行有雙字。二十六行賴上是存字。三十行有是字。三十二行有親字。四十行有置字。後銘有潁川太守字。訪碑錄題爲潁川太守題名。即此碑。

嵩山少室神道石闕銘 延光二年三月

右少室神道石闕銘在登封縣西十里邢家鋪。碑額少室神道之闕六字。陰文篆書。依翁氏所釋。二十二行亦有界畫直綫。將作掾嚴壽與太室前銘鄉三老嚴壽是一人。漢書地理志西河郡有圓陽圓陰。師古曰圓字本作圓。王莽改爲方陰。當時已誤爲圓字。此銘亦作圓陽。此銘上層諦視之。尚有以山靈靈素名嘯數字隱隱可辨。牛氏金石圖未載。

少室東闕題名

右少室東闕題名在少室神道石闕銘之東。題名十二人。令常令容。史記孝文本紀中大夫令勉顏游秦。以令是姓。風俗通令姓。令尹子。文之後。相即查字。

嵩山開母廟石闕銘 金石文字記 延光二年

右開母廟石闕銘在登封縣北十里崇福觀東。依翁氏所釋。下層十一行前尚有一行。有字隱隱可辨。祀聖母摩山隅後上下層脫一行。所未釋字尚多。蓋所得拓本有優劣也。太守朱寵以下題名共十一人。與少室神道石闕同者八人。佐即廟佐。臨作隣。胥作骨。伯鯨作栢鯨。逍遙作消播。九山刊旅作九山甄旅。皆異文。

延光殘碑 延光四年六月

右延光殘碑。康熙年間諸城縣修超然臺出土中。今移置縣署。碑文五行皆有界畫直綫。碑首界畫外有字似碑額。橫書。碑唯下段可

辨。末行有延光四年六月卅日庚戌字極分明。第三行中段尚有郡字孫字可辨。金石萃編山左金石志俱未釋。

敦煌太守裴岑紀功碑

永和二年八月

右敦煌太守裴岑紀功碑在巴里坤城西北三里關帝廟前。後漢書西域傳。延光二年陳忠上疏。以爲敦煌宜置校尉。案舊增四郡屯兵以西撫諸國。故前後西域出師皆敦煌太守將兵。裴岑爲敦煌太守當在徐由之後司馬達之前而史不書其名。此碑巴里坤土人有重刻本。有德祠海河之辨。諦視此本作謹本是德字後人誤釋作海耳。

北海相景君銘并陰

漢安二年八月

右北海相景君銘在濟寧州學宮。碑雖漫漶諦視之不可辨者無幾。景君以司農屬官出宰元城。遷益州太守。以路遐戀親。改北海相。以病去官。漢安二年仲秋卒。三載後。故吏諸生乃立是碑。惜不書其名字邑里。碑云北海部城十九。續漢志北海國十八城。樂安國益壽光二縣皆故屬北海。此時當有一縣未改屬。碑陰有故年六人。續漢志里有里魁。民有什伍。什主十家。伍主五家。以相檢察。年即伍也。隸續以午爲幹字之省。非是。

敦煌長史武斑碑

建和元年二月

右敦煌長史武斑碑在嘉祥縣紫雲山。碑云建和元年太歲在丁亥二□辛巳朔。桓帝紀。建和元年正月辛亥朔。正月大故。二月辛巳朔。碑與史合。斑字宣張。據武氏石闕銘。宣張仕濟陰。年廿五。曹府君察舉孝廉。除敦煌長史。碑俱約綜其詞。以永嘉元年□月□日遭疾□。河間高陽史恢等追惟昔日同歲郎署。故□石銘碑。似斑舉孝廉爲尚書郎。故碑云□翼紫宮領校秘郎。續漢志注引決錄注。故事尚書郎以令史久缺補之。世祖始改用孝廉爲郎。斑以孝廉爲尚書郎領校秘書除敦煌長史。其官階亦相合。

武氏石闕銘

建和元年三月

右武氏石闕銘在嘉祥縣紫雲山黃小松司馬始訪得之。武斑碑在建和元年二月辛巳朔廿三日癸卯。此闕在建和元年三月庚戌朔四日癸丑。其相距止十二日。武斑碑稱武氏漢興以來爵位相踵。此闕有武始公弟綏宗。景興。開明。開明子宣張。宣張即斑也。開明爲吳郡府卿。又有中子榮字含和舉孝廉郎中遷執金吾丞。綏宗名梁爲從事。子仲章。季章。季立。孫子儁。武梁武榮俱有碑亦氏族之盛者。

司隸校尉楊孟文石門頌

建和二年十一月

右司隸校尉楊孟文石門頌在襄城縣北五里。水經沔水注。褒水又東南歷小石門門穿山通道六丈有餘。刻石言漢明帝永平中。司隸校尉健爲楊厥之所開。逮桓帝建和二年。漢中太守同郡王升嘉厥開鑿之功琢石頌德即此碑也。碑云。永平四年。詔書開余鑿通石門。中遭元二西夷虐殘橋梁斷絕。于是故司隸校尉健爲武陽楊君厥字孟文數上奏請。帝用是聽。則楊君之開通石門不在永平中也。楊君名渙字孟文。其云厥者。助語之詞。順帝紀。延光四年詔益州刺史罷子午道通褒斜路。隸釋以爲即從楊君之所請。建和二年仲冬。漢中太守王升勒石頌德距其時又二十四年矣。

孔廟置守廟百石卒史碑

永興元年六月

右孔廟置守廟百石卒史碑在曲阜縣孔子廟。司徒雄司空戒以元嘉三年三月廿七日壬寅奏雒陽宮。即以是日下魯相承書從事下當用者。魯相平以永興元年六月甲辰朔十八日辛酉上司空府。桓帝紀。元嘉三年五月丙申改元永興。其置百石卒史始未止八十日。碑云。褒成侯四時來祠。事已即去。史晨祀孔子奏亦云。雖有褒成世享之封。四時來祭。畢即歸國。漢書恩澤侯表。褒成侯國在瑕丘地理志。瑕丘屬山陽郡。是時孔子襲封子孫不在魯國。故魯相乙瑛請置百石卒史典主守廟。魯令鮑豐造作百石吏舍。亦考闕里文獻者所宜知也。

宛令益州刺史李孟初神祠碑 永興二年六月

右宛令益州刺史李孟初神祠碑在南陽縣。其名已闕孟初其字也。舉孝廉除郎中遷宛令益州刺史。己亥朔十日下午。金石萃編有宛令二字諦視此碑亦有而兩漢金石記無之。宛爲南陽郡治。貴君以下皆宛令故吏名。

孔謙碑 永興二年七月

右孔謙碑在曲阜縣孔子廟。謙字微渤尚可辨。謙字德讓。宣尼公廿世孫都尉君之子也。漢書平帝紀。元始元年六月追謚孔子曰褒城宣尼公。都尉君者。泰山都尉孔宙也。後漢書孔融傳。父宙。泰山都尉。李賢注引融家傳。兄弟七人。融第六。唯有兄襲見融傳不及謙也。孔宙碑。年六十一。延熹六年正月卒。謙卒于永興二年七月。時宙尚存。年五十一。獻帝紀。建安十三年八月。曹操殺太中大夫孔融。融本傳。時年五十六。謙卒時。融止二歲。

孔君殘碑 永壽元年

右孔君殘碑。何夢華上舍訪得于孔林墻外今移置孔子廟。元年乙未上字已泐。趙明誠金石錄定爲桓帝永壽元年。碑云孔子十九世孫。當是孔宙孔彪兄弟行。其所歷官五官掾守長史兼行相事字尚可辨。

魯相韓勅造孔廟禮器碑并陰兩側 永壽二年

右魯相韓勅造孔廟禮器碑。在曲阜縣孔子廟。水經泗水注。魯人藏孔子所乘車于廟中。是顏路所請者也。永平中。鍾離意爲魯相。到官出私錢萬三千文付戶曹孔訢治夫子車。此碑亦云修飾宅廟更作二輿在意之後。續漢志。東武陽屬東郡。孔宙碑亦云東郡東武陽。此碑獨書東郡武陽。省東字。

郎中鄭固碑 延熹元年四月

右郎中鄭固碑在濟寧州學宮。碑舊拓止上段近始得下段殘石又洗出中段拓本始完。固字伯堅。著君元子。續漢志。著屬濟南國。其父

爲著令也。延熹元年二月十九日。詔拜郎中。以疾錮辭。未滿期限。乃遭凶愍。其四月廿四日遇命殞身。漢書汲黯傳。黯多病。病且滿三月。上常賜告者數。疏廣傳。即日父子俱移病。病三月賜告。廣遂稱篤。固自拜官至卒止六十餘日故尚未滿期限。琦璿延以爲至德不祀。爾雅。延。長也。琦璿當是其兩弟名。

蒼頡廟碑并陰兩側 延熹五年正月

右蒼頡廟碑在白水縣東北五十里史官村。續漢志衙縣注引皇覽曰。有蒼頡家在利陽亭南。墳高六丈。後人因建廟于其縣。廣韵。倉姓黃帝史官倉頡之後。此碑作蒼。碑額有左馮翊東牟平陵衡君。東牟屬東萊郡。此云東牟平陵。當由東牟而遷于平陵也。碑字體最小漫漶亦最甚。兩側明白可辨。

泰山都尉孔宙碑并陰 延熹七年七月

右泰山都尉孔宙碑在曲阜縣孔子廟。宙字季將。孔子十九世孫。孔融父也。後漢書孔融傳。年十歲隨父詣京師。年十三喪父。獻帝紀。建安十三年八月。曹操殺太中大夫孔融。融傳云。時年五十六。融當生于永興元年。此碑宙年六十一。延熹六年正月己未卒。時融年十一。後漢書融傳作十三喪父者誤也。桓帝紀延熹三年九月。太山琅邪賊勞丙等復叛。寇掠百姓。十一月。太山賊叔孫無忌攻殺都尉侯章。十二月。遣中郎將宋資討破之。宙爲泰山都尉當在侯章之後。融年十歲。隨父詣京師。則宙之爲泰山都尉會遭篤告休當在延熹五年。

竹邑侯相張壽碑 建寧元年五月

右竹邑侯相張壽碑在城武縣學宮。後人截其碑爲碑跌而穴其中今僅存一百八十字。隸續載此碑甚完。後漢書彭城靖王恭傳。永初六年封恭子阿奴爲竹邑侯。壽遷竹邑侯相遭江楊劇賊役賦彌年。質帝紀。永嘉元年。廣陵賊張嬰等復反攻殺堂邑江都長。九江賊徐鳳

等攻殺曲陽東城長。本初元年詔曰。九江廣陵二郡數離寇害。殘夷最甚。碑所謂江楊劇賊即此。壽視事年載治功曹周憐放濫。爲督郵周紘所表捐祿。後復辟司徒府。年八十。建寧元年五月辛酉卒。是月丁未朔辛酉十五日也。

衛尉卿衡方碑并陰

建寧元年九月

右衛尉卿衡方碑在汶上縣西南十五里郭家樓。碑云。詔選賢良。招先逸民。務在寬失。李固傳。伏聞詔書。務求寬博。寬博即寬佚也。已從政者。退就勅巾。陳寔傳。飾巾待終。趙咨傳。使飾巾出入。李賢注。以幅巾爲首飾。不加冠冕。謂弃官以就舉也。安貧樂道。皇侃論語義疏本作未若貧而樂道。少以文塞。長以欽明。即尚書考靈曜欽明。文塞晏晏。此碑用古義最多。餘皆如諸家所釋。

魯相史晨奏祀孔子廟碑

建寧二年三月

右魯相史晨奏祀孔子廟碑在曲阜縣孔子廟。史晨奏以建寧二年三月癸卯朔七日己酉上尚書。時副言太傅太尉司徒司空大司農府治所部從事。續漢志以太傅太尉司徒司空大將軍爲五府。此大司農亦稱府。大司農掌諸錢穀金帛諸貨幣。晨奏祀孔子。依社稷出王家穀。春秋行禮。以共烟祀。是其專掌。故并及之。

魯相史晨饗孔廟後碑

右魯相史晨饗孔廟後碑。即刻在前碑之陰。史晨以建寧元年四月十一日戊子到官而饗孔廟及補完廡垣修通大溝。又昌平亭下立會市。孔濱南北種梓。假夫子冢顏母井舍及魯公冢守吏事皆在前碑之後。魯公冢者。伯禽冢也。魏書地形志。魯有伯禽冢。續漢志補注引皇覽曰。奄里伯公冢在城內祥舍中。民傳言魯五德奄里伯公葬其宅。伯公即伯禽之訛。

淳于長夏承碑

建寧三年六月

右淳于長夏承碑在永年縣紫山書院。金石錄云。元祐間因治河堤得

于土壤中。余家所藏漢碑二百餘卷此碑最完。至明中葉此碑猶存唯下半截殘缺。今世所傳有關三十十字本闕一百十字本。成化間補刻下半截本。嘉靖二十三年碑爲築城工役所毀。知府唐曜重刻于漳川書院即此本也。舊本勤約。重刻本作勤紹。末云建寧三年蔡邕伯喈書。是後人臆題。

陳德殘碑

建寧四年三月

右陳德殘碑。牛氏金石圖云。碑在沂州府東南數十里田間。郃陽褚峻迹得之。拓數本。則土人埋之矣。或云即褚千峰偽造。碑止存上截十行。行五字。每字有方格界綫。碑陰十一行。俱有額。諦視之。字僅形似。乏漢隸淳古之氣。其爲偽造無疑。

武都太守李翕西狹頌

建寧四年六月

右武都太守李翕西狹頌在成縣。摩崖書。翕漢陽阿陽人。阿陽。水經漾水注作河陽。漢書高帝紀師古曰河陽。今流俗書本或作河陽者。非也。後漢書隗囂傳李賢注亦云本爲河陽者。誤也。此碑作阿陽與續漢志同。碑額有惠安西表四篆字。年月後有丞右扶風陳倉呂國字文寶小字題名二行。又有丞右扶風陳倉呂國字文寶大字題名十二行。即隸續所謂天井道題名。

李翕龍池五瑞圖

右李翕龍池五瑞圖。在西狹頌之前。上層爲白鹿黃龍。下層爲甘露降承露人嘉禾木連理。後題君昔在龍池修嶠嶽之道。德治精通。致黃龍白鹿。下闕之瑞。故圖畫其像。又有上官掾上祿上官正字君選題名三行。後尚有龍字隱隱可辨。

博陵太守孔彪碑并陰

建寧四年七月

右博陵太守孔彪碑在曲阜縣孔子廟故吏崔烈等所立。續漢志無博陵郡。桓帝紀。延熹元年六月丙戌。分中山置博陵郡以奉孝崇皇園陵。水經滏水注。漢質帝本初元年。繼孝冲爲帝追尊父翼陵曰博陵

因以爲縣又置郡焉。漢末罷還安平。故續漢志不書。此本桓帝繼質帝。水經注以爲質帝繼冲帝鄧氏之誤。博陵置縣在本初元年。置郡在延熹元年。以此碑陰證之。屬縣曰博陵曰安平曰安國曰高陽曰南深澤。成陽靈臺碑又有蠡吾皆屬博陵郡。彪爲尚書侍郎見韓勅碑陰。爲河東太守見史晨後碑。

李翕析里橋郡閣頌 建寧五年二月

右李翕析里橋郡閣頌在略陽縣。隸釋所載缺四十一字。後有年月題名五行。金石萃編本無年月題名視隸釋多闕十三字。此本又視王氏本多缺三十七字。然皆非明申如垣翻刻之本。此本建寧三年與隸釋同。王氏本作五年當由摹刊之訛。香風有隣。香通作鄉。香風即嚮風。醴散關之嶄潔。說文。嶄。峯也。峯山形。玉篇。嶄。同峯。潔即嚮字之借。諸家皆誤釋。

執金吾丞武榮碑

右執金吾丞武榮碑在濟寧州學宮。闕幘傳講孝經論語漢書史記左氏國語。今碑漢書史記四字已泐。漢書藝文志。太史公百三十篇。東平王思傳上書求太史公書。楊終傳受詔刪太史公書。此皆秘府藏本。漢書亦至漢末有應劭集解服虔音義二書之傳。榮其嚮矢矣。碑云內幹三署。後漢以五官署左右署爲三署。謂榮爲五官掾也。碑字十行。行三十字。僅刻碑之半。

司隸校尉楊淮表紀 熹平二年二月

右司隸校尉楊淮表紀在褒成縣褒斜谷。叙淮與從弟頤前後歷官。稱元弟功德牟盛。當究三事。不幸早隕。二君清□約身。俱大司毅孟文之元孫也。後漢書任城王以元和元年封。傳六十八年國絕。當元嘉元年至延熹四年復爲國。淮爲任城太守當在元嘉至延熹十年中。孟文名渙。見華陽國志。司隸校尉稱大司隸。亦僅見此碑。

司隸校尉魯峻碑并陰 熹平二年四月

右司隸校尉魯峻碑。在濟寧州學宮。峻爲司空王暢所舉。徵拜議郎太尉長史御史中丞。延熹七年二月丁卯拜司隸校尉。後漢書靈帝紀。建寧元年四月長樂衛尉王暢爲司空。八月司空王暢免。碑叙在延熹七年以前何也。碑陰河內夏管懿旁遠千。河內無夏縣。此與楊孟文石門頌鼂漢疆同爲東漢二名之證。平原西平昌。續漢志平原九城。今本八城。西平昌三字脫。在樂安國注中。河間阜城。續漢志阜城屬安平國。此時猶屬河間。河東蒲坂作反。魏郡黎陽作犁。皆與續漢志异。

熹平殘碑 熹平二年十一月

右熹平殘碑。在曲阜縣孔子廟。近時始出土。年廿有七。熹平二年十一月乙未。蓋其卒時年月。靈帝紀。是年十二月癸酉晦乙未爲十一月廿一或廿二也。但無官爵名氏。府君者是稱其立碑之人故書在卒後。孔褒碑亦魯相汝南陳府君立即其證。錢辛楣少詹謂當是曾任郡守者卒時年廬廿有七。非是。

武都太守耿勳碑 熹平三年四月

右武都太守耿勳碑在成縣。隸續有在碑。後殘泐重開故多訛字。癸酉到官。重開本作癸日。郎官勸勉趁時。重開本勉作課。□如農。重開本作大小民。此本雖已重開而翁王兩家據隸續所補之字此尚隱隱可辨洵可寶也。扶活下。隸續作□餐。諦審此碑是餐餐二字。內則注似今膏餐矣。說文。餐。小兒懶餐。外羌且下。隸續作□。諦審此碑是居字。

開憲長韓仁銘 熹平四年十一月

右開憲長韓仁銘在滎陽縣署。金正大中滎陽令李天翼得于京索間土中。碑止存上截。碑右有正大五年趙秉文李獻能題字。前半似叙司隸校尉續勳。下云尉表上。似仁爲司隸校尉所表遷槐里令。除書未到而卒。續漢志。縣萬戶以上爲令。不滿爲長。仁自開憲長遷槐里

令如今之調繁。孔宙碑都昌長遷元城令張遷碑除穀城長遷蕩陰令皆其證。

堂谿典嵩高山石闕銘 熹平四年

右堂谿典嵩高山石闕銘。在登封縣開母廟石闕銘下。趙明誠金石錄堂谿典嵩高山石闕銘云。中郎將堂谿典伯并熹平三年來請雨嵩高廟。此銘前數行已泐。尚隱隱可辨如趙之言。典大君諱協字季度。爲郡主簿。作闕銘文。後舉孝廉。西鄂長。早終。熹平四年。典來請雨嵩高廟重泐此銘。後漢書延篤傳注引先賢行狀。典字季度。爲西鄂長。以協爲典恐由唐人徵引之誤。靈帝紀。熹平五年復崇高山爲嵩高山。注。東觀記曰。使中郎將堂谿典請雨。因上言改之。典請雨在四年。山改名在五年。

豫州從事尹宙碑 熹平六年四月

右豫州從事尹宙碑在鄆陵縣。孔子廟碑云。分趙地爲鉅鹿。顧亭林謂鉅鹿之鹿不當從金。錢辛楣少詹謂廣韵注明言鉅鹿郡名。後魏吊比千碑陰有鉅鹿伯魏祐。北史有鉅鹿郡守元道龍。顧焯近見魏靈藏造像記亦作鉅鹿魏靈藏。後漢書陳敬王羨傳。建初三年。與鉅鹿王恭就國。影宋本北堂書鈔第七十卷引范後漢書作鉅鹿王。足證古本皆作鉅。

溧陽長潘乾校官碑 光和四年十月

右溧陽長潘乾校官碑在溧水縣學宮。碑云。此龜艾遂尹三梁。龜謂印紐。艾謂青綬。續漢志。進賢冠公侯三梁。中二千石以下至博士兩梁。故此碑以三梁爲頌禱之詞。靈帝紀。光和四年九月庚寅朔。碑云十月己丑朔。是年閏九月小。故十月己丑朔。兩漢金石記謂是閏十月己丑朔者誤也。有天口德之絕操。諦視天下是遼字。翁王亦未舉。

白石神君碑 光和六年

右白石神君碑在元氏縣開化寺。碑云。縣界有六名山。三公封龍靈山先得法食去。光和四年。三公守民蓋高等始爲無極山詣太常求法食。相縣以白石神君道德灼然乃具載本末求依無極爲比。六名山者。此碑得其五。其一則御語山也。見元初四年三公山碑。毛詩雲漢篇。敬恭明神。釋文本神作祀。此碑作敬恭明祀與陸氏本同。

尉氏令鄭季宣碑并陰 中平二年四月

右尉氏令鄭季宣碑在濟寧州學宮。此碑宋時已殘缺。隸續所錄僅二百六十八字碑陰二百九十二字。兩漢金石記舊拓本可見者四十八字碑陰九十一字。此本可見者三十一字碑陰七十七字。協上神人二字甚明。金石萃編摹本反闕之。翁氏本又不著協字何也。

郃陽令曹全碑并陰 中平二年十月

右郃陽令曹全碑在郃陽縣孔子廟。明萬曆初出土時止缺一因字。後乃中有斷裂。又後乾字中日有穿連之。世恒以此辨拓本新舊。全以建寧二年舉孝廉。除郎中。拜西域戊部司馬。遷右扶風槐里令。弃官。光和六年復舉孝廉。除郎中。拜酒泉祿福長。轉拜郃陽令。門下掾王敞等刊石紀功。末言君高升極鼎足。此時全尚存也。碑云。縣前以河平元年遭白茅谷水災。退于戌亥之間。興造城郭。是後舊姓及修身之士官位不登。君乃閔縉紳之徒不濟。開南寺門。承望華岳。鄉明而治。庶使學者李儒樂規程寅等各獲人爵之報。戌亥之間。謂西北隅以干支紀方位。尚書大傳已然。今人因科名罕隼改造城垣官署冀得顯仕。觀此碑知其風始于東漢矣。碑陰有徵博士李儒文優。

蕩陰令張遷碑并陰 中平三年二月

右蕩陰令張遷碑在東平州學宮明時始出。碑爰既且于君。暨字分爲二。顧亭林疑爲後人重刊。其實當時撰文一人。書石一人。古碑往往有文義相屬中空一格此無足怪。遷治京氏易。京氏長于災變。分

六十卦。更直日用事以震離兌坎爲方伯監司之官專主四時。此云二月震節。即京氏義也。周禮職方氏言四夷八蠻七閩九貉五戎六狄。明堂位言九夷八蠻六戎五狄。大戴記言六蠻四夷。爾雅言九夷八狄七戎六蠻。此碑又云八蠻七戎五狄九夷。皆所見本異。

豫州從事孔褒碑

右豫州從事孔褒碑。雍正三年始出于曲阜縣東周公廟側。今移置孔子廟。碑云。君諱褒。字文禮。孔子廿世之孫泰山都尉之元子。即孔謙孔融之長兄也。褒與融留舍張儉。後事泄送獄。一門爭死。詔書坐褒。儉抵褒。時融年十六。當建寧元年。史晨饗孔廟後碑立于建寧二年間。稱處士孔褒。文禮其時尚未爲豫州從事。孔謙以永興二年七月卒。年卅四。褒爲謙兄。自建寧二年上距建光元年謙生時已四十九年。褒死時當又不止于此數之歲。

魯相謁孔廟殘碑

右魯相謁孔廟殘碑在曲阜縣孔子廟。隸釋有此碑。土人稱爲吉日令辰碑。以第一行有吉日令辰四字也。牛氏金石圖誤題爲孔宏碑。近時搜訪始有碑陰并碑側唐人題字。見山左金石志。

中部督郵殘碑陰

右中部督郵殘碑陰在曲阜縣孔子廟。碑多剝裂痕似竹葉。土人因名爲竹葉碑。其正面亦有字。碑陰所書有中部督郵南部督郵北部督郵。續漢志每郡有五部督郵是也。又有中賊曹左賊曹右賊曹左戶曹右戶曹左決曹。右決曹。奏曹辭曹功曹不分中左右。當日分曹必有繁簡之別。續漢志不書。

戚伯著碑

右戚伯著碑見隸釋第十二卷。隸釋稱碑而爲性焉。以性爲姓也。此本作姓字甚分明。隸釋焉下。關漢。關三字。已。關二字。此本焉下。關六字。漢。比隸釋少一字。又闕字位置不同。碑末隸釋卿相之下。關十字有

伯著二字此本無之。隸續碑式戚伯著碑隸額一行十九字此本止之碑二字。碑十二行行二十字。此本剪裱每行約六字。有直剪痕而無橫接痕。非隸釋隸續所見之本。孫退谷有感伯著碑見朱竹垞曝書亭集。此本有北海孫氏珍藏書畫印。

仙人唐公房碑

右仙人唐公房碑在城固縣西北三十里。碑殘泐僅存三百餘字。以隸釋讀之。王莽居攝二年。君爲郡吏。是時府在西成。去家七百餘里。休謁往來。轉景即至。漢書地理志。漢中郡西成第一縣。續漢志南鄭第一縣。西成第三縣。觀此碑。西漢漢中郡治西成。足訂閻百詩潛丘札記謂西漢郡治非第一縣漢中郡治不在西成之誤。

子旂殘碑

右子旂殘碑。與下劉君元孫正直三殘碑在安陽縣西門君祠中。此碑存十二行七十八字。首云允字子旂。不知其姓。第六行末有永初二年。允當是安帝時人。敝即輔字。

劉君殘碑

右劉君殘碑。一石存六行十五字。第二行有春秋博覽四字當亦顓經之士。一石存五行二十二字有國之裔今四字因知其人姓劉。兩石中皆有穿孔。碑側有歲在辛酉三月十五八字。

元孫殘碑

右元孫殘碑存七行十八字。第二至第四行無字。可知唯遺孤奉承。大兄元孫早終。二子名重字元□而已。

正直殘碑

右正直殘碑。存八行三十八字。第一行有正直是以揚名于州里。第二行有部職二字。其人似常爲曹掾。第四行終年下似卅字。碑中有大穿孔。下有年三三二字。似其人終時年卅□當□年之三月也。碑字覈作竅。究作究。其作元。

魯王墓石人胸前題字

右魯王墓石人胸前題字。一曰府門之卒。一曰漢故樂安太守廬君亭長。舊在曲阜縣魯恭王墓前。今移置嬰相圃。此當爲樂安太守廬君墓前之物。與魯恭王墓相近。土人因稱爲魯王墓石人。太守稱府君。故此石人稱府門之卒。

孝堂山石室畫象

右孝堂山石室畫象在肥城縣西北六十里。舊釋是郭巨石室。有永建四年永康元年題字。所畫岑樓重閣。屋脊設鳳凰。或猴或雁。形貴者冠。皆平樣。前仰後俯。即續漢志所謂進賢冠。次則前低後高。如紗帽無翅。賤者銳其上。車皆兩輪兩較。較或高出輪半。前式減輪半。或兩較高僅及輪半。前式又減較半。或竟無。兩較中有平蓋圓形出較上。一程擎之。又有曲幹枝其四角。幹或在較外。又有較與蓋四周相屬。如今車形。即古之安車。或一人中坐。較僅及肩。一人前立執輿。一人後立侍車。皆空其後面。或駕四馬或兩馬或一馬皆一轅上曲繫于馬首。大王車駕以四馬馬首有衡衡上立一鳥長尾形。續漢志。乘輿鸞雀立衡。徐廣曰。置金鳥于衡上是貴者所乘。又有兩輪車四人繩挽之古謂之輦。又有兩輪車上闔下狹中坐四人蓋極高。有兩人持刀舞及懸一物如鼓形亦御以兩馬疑即續漢志所謂黃門鼓車。

武梁祠堂畫象

右武梁祠堂畫象在嘉祥縣南武宅山。凡三石。石五層。中三層畫皆有題字。帝王伏羲至夏桀十人。唯黃帝顓頊帝偁帝堯帝舜冕服梁節。姑姊妹者齊繼母無鹽醜女榆母章孝母婦人皆長服被土。曾母投杼坐機上。機制與今同。其足略小。或以爲古人纏足之證。非也。車凡九。見輅蓋之製。皆與孝堂山畫象同。唯處士牛車略異。

武氏前石室畫象

右武氏前石室畫象在嘉祥縣武氏祠。凡十五石。三石無字。文王十

子題字可見者七人。魯秋胡老萊子荆軻秦武陽已見祠堂畫象此復畫之。有曰。此君車馬。君爲都□時君爲市掾時爲督郵時。不知武氏何人。

武氏後石室畫象

右武氏後石室畫象在嘉祥縣武氏祠。凡十石題字俱漫泐。有石柱題武家林三字。黃小松司馬謂邊幅隱隱八分書中平等字。諦視之不可辨。

武氏左石室畫象

右武氏左石室畫象在嘉祥縣武氏祠。凡十石。惟第一石有顏淑侯羸王陵母范贖四段事迹。題字顏淑。毛詩巷伯傳作顏叔子。

武氏石室祥瑞畫象

右武氏石室祥瑞畫象在嘉祥縣武氏祠。凡二石。每段畫祥瑞草木禽魚之狀。題記皆與孫氏瑞應圖宋書符瑞志相同。白魚武□津入于王舟。本今文泰誓。獸作獸。又作獸。禦作衛。秬鬯作巨囑。皆異文。

武氏石室新出畫象

右武氏石室新出畫象。凡九石。一石上下俱漫泐。中有武氏祠三大字八分書。一石上有獸首口銜大環與射陽石門畫象同。一石上層二人騎馬前後行。下層漫泐。中層似有題字五行不可辨。餘俱作人馬宮室形無題字。

孔子見老子畫象

右孔子見老子畫象舊在嘉祥縣武宅山今移置濟寧州學宮。此畫象見隸續。老子車後三人。隸續止一人。隸續老子曳曲竹杖。今杖已泐。老子車兩較與蓋相連。孔子車兩較僅及蓋十分之七。隸續未釋。

洪福院畫象

右洪福院畫象在嘉祥縣劉村。凡三石。唯一石有成王周公魯公三人題字。成王南面。周公魯公在成王右東面冠前仰後俯。又有侍臣二人在成王左西面冠前後齊。無題字。餘如翁氏所釋。

射陽石門畫象

右射陽石門畫象在寶應縣東七十里射陽聚。今爲汪容甫取歸江都。凡二石。孔子見老子象。孔子居中西面。老子居左東面。一弟子在孔子後西面。與濟寧州學官象不同。中層中間有如今之佛坐。有一人赤身居其上。左右侍立各一人皆可辨。餘如翁氏所釋。

朱鮪墓石室畫象

右朱鮪墓石室畫象在金鄉縣西三里。皆畫男女燕饗杯盤尊勺帷屏之屬。朱長舒之墓并鮪字四行題字。山左金石志記之詳矣。以此本諦視之。一幅尚有朱字極分明。

平津讀碑記卷二

魏

公卿上尊號奏 黃初元年

右公卿上尊號奏亦名勸進碑在許州繁城鎮。碑首結銜四十六人。自陛下即位光昭文德以下刻于碑陰。據魏志文帝紀注。延康元年十月丙午。漢帝使張音持節禪位。相國歆。太尉詡。御史大夫朗等前已上表勸進。丁卯令不受。己巳魏王復上書辭。庚午復冊詔魏王桓階等議定。辛未魏王登壇受禪改爲黃初元年。此表是最後所上當在己巳夕間。庚午冊詔之前侍中劉廙表稱今月十七日己未。己巳是十月廿七日也。

受禪碑 黃初元年十月

右受禪碑在許州繁城鎮。碑首云。唯黃初元年冬十月辛未。皇帝

受禪于漢氏。辛未。十月廿九日也。集古錄據此碑以訂魏志十一月庚午王登壇受禪之訛。其說極核。裴松之注引獻帝傳亦云。辛未魏王登壇受禪。與此碑合。碑云。納于大鹿。欽明文塞。上在璿機。烟于六宗。皆用今文尚書。常伯常任。納言諸節。諸節二字本今文泰誓。又云。□唐典之明憲。遵大鹿之遺訓。亦可爲舜典合于堯典一篇之證。

封宗聖侯孔羨碑 黃初元年

右封宗聖侯孔羨碑在曲阜縣孔子廟。碑云。黃初元年。大魏受命。追存二代三恪之禮。秉紹宣尼褒成之後。以魯縣百戶命孔子廿一世孫議郎孔羨爲宗聖侯。以魯縣百戶命孔子廿一世孫。議郎孔羨爲宗聖侯。以奉孔子之祀。魏志在黃初二年。蓋封孔羨爲宗聖侯在黃初元年十一月後。詔制三公及令魯郡修起舊廟置百石吏卒在黃初二年正月。碑特連文書之。後漢書孔僖傳。初平帝時。王莽秉政。乃封孔子後孔均爲褒成侯。及王莽敗失國。建武十三年世祖復封均子志爲褒成侯世世相傳。至獻帝初國絕。此碑云。大道衰廢。禮學滅絕卅餘年。皇上紹繼微絕。獻帝即位初平元年。下距黃初二年共卅二年。其數正相合。

膠東令王君廟門碑 黃初五年

右膠東令王君廟門碑在濟寧州學官。隸續本有此斷碑以他碑下段合讀爲一後乃知其誤。其石久亡。乾隆四十年李東琪始訪得其上段。碑皆述王氏先世有云葬于京師者五世。碑末叙其人年卅有一。卒當黃初五年。京師當謂洛陽。

廬江太守范式碑并陰 青龍三年

右廬江太守范式碑在濟寧州學官碑僅存上段。式字巨卿。山陽金鄉人。見後漢書獨行傳。傳云式後遷廬江太守。有威名。卒于官。碑云遷廬江太守。寶疏氏之至順。以疾告辭。式未嘗卒于官。是史

誤。碑云常山相暨子汜孫而胤嗣繼。青龍二年上計吏翟循等刊銘樹墓。傳云式一名汜。亦誤也。碑陰有題名四列。隸釋誤爲魯峻碑陰。今又失其大半。

東武侯王基碑 景元二年四月

右東武侯王基碑在洛陽縣近年始出土。相傳下半段尚有未刻朱字應手而滅。碑止得其中段前三行行廿二字。後十六字俱下一格行廿一字。銘辭我下文尚未完。上下石理完好。方格界綫具在。其爲未刻完碑無疑。基字伯輿。東萊曲城人。魏志有傳。以此碑證之。所歷官階及薨年追贈皆合。後漢書鄭玄傳門人東萊王基。此碑年七十二。景元二年四月辛丑薨。玄卒于建安五年。基止十一歲未必親受業于鄭君故傳稱門人而不稱弟子亦其證也。

遼寇將軍李苞通閣道碑 景元四年十二月

右遼寇將軍李苞通閣道碑在褒城縣石門。苞通閣道在景元四年十二月。魏志三少帝紀。景元四年夏五月。詔使鄧艾鍾會伐蜀。鍾會傳會統十餘萬衆分從斜谷駱谷入。先命牙門將許儀在前治道。會在後行。而橋穿馬足陷。于是斬儀。其時閣道之壞可知。十一月蜀平後因有此役。前有潘宗伯韓仲元泰始六年造橋閣題字。

吳

九真太守谷朗碑 鳳凰元年四月

右九真太守谷朗碑在耒陽縣。碑云豫章府君之曾孫。公府君之孫。公府君當是三公府之屬官。他碑未見此稱。朗弱冠歷右職守陽安長。其守陽安長者。非授陽安長也。故升王府除郎中尚書令史郡中正遷長沙劉陽令。與調任之制异矣。遷部廣州督軍校尉。吳志。黃武五年。分交州置廣州。俄復舊。永安七年。復置廣州。此爲廣州督軍校尉。當在永安以後。碑云獨與弟居。翁氏釋居作展。誤。

禪國山碑 天璽元年

右禪國山碑在宜興縣張渚鎮北董山之巔。碑形圓而橢土人稱爲圓碑以其形似米囤也。碑叙孫皓即位以來郡國祥瑞千餘言。又于乙未年正月辛亥得玉璽。文曰吳真□帝。乃以次年丙申改元天璽。于是丞相沈等十四人請封禪國山告祭刊石。吳志。天璽元年。吳郡言臨平湖邊得石函。中有小石。青白色。長四寸。廣二寸餘。刻作皇帝字。于是改元大赦。臨平湖邊所得小石即碑所云玉璽也。改元者改天冊爲天璽也。志又于秋八月後言吳興陽羨山有空石。長十餘丈。名曰石室在所。表爲天瑞。乃遣兼司徒董朝兼太常周處至陽羨縣封禪國山。明年改角大赦以協石文。改元者改天璽爲天紀也。其實臨平湖得玉璽在天冊元年正月。封禪國山在天璽元年八月後。故碑叙丞相沈等請封禪國山在改元天璽之後。志稱臨平湖得玉璽亦在天璽元年此則史之誤也當以碑爲正。

天發神讖碑 天璽元年八月

右天發神讖碑在江寧府學尊經閣嘉慶十一年毀于火。據山謙之丹陽記。此石晉宋時已析爲三段故又稱三段碑亦名紀功碑。上天帝言以下皆天發神讖文。天璽元年泰月以下皆驗。視文字始末。蘭臺東觀令以下皆摹刻立石銜名。吳志是年言得石者三獨不書此碑始末。蓋其時言符瑞者日至史書之不勝書也。會稽陳治九江費字皆不見于史。

衡陽太守葛祚碑

右衡陽太守葛祚碑在句容縣西五里。寶刻叢編引諸道石刻錄有此碑。文云吳故衡陽郡太守葛府君之碑。搜神記。葛祚字亢先。丹陽句容人。吳時爲衡陽太守。郡境有大槎橫水能爲妖怪。祚將去官。乃大具斤斧之屬將伐去之。是祚自衡陽太守歸卒于家。此是表墓之碑而僅存其額。吳志太平二年以長沙西部爲衡陽郡。沛郡繆綽亦嘗爲是郡太守見薛瑩傳。